

景明刻本  
古今逸史

四四





華陽國志序

甲林日氣  
呂大防微仲撰

先王之制自二十五家之間書其恭敏任恤等而上之或月書其學行或歲考其道德故民之賢能衰惡其吏無不與知之者焉漢魏以還井地廢而王政闕然猶時有所考察旌勸而州都中正之職尚修於羣國鄉閭士女之行多見於史官隋唐急事緩政此制遂廢而不舉潛德隱行非野史紀述則悉無見於時民日益漓俗日益卑此有志之士所爲歎惜也晉常璩作華陽國志於一方人物丁寧反覆如恐有遺雖

蠻髦之民井曰之婦苟有可紀皆著於書且云得之  
陳壽所爲者舊傳按壽嘗爲郡中正故能著述若此  
之詳自先漢至晉初踰四百歲士女可書者四百人  
亦可謂衆矣復自晉初至于周顯德僅七百歲而史  
所紀者無幾人忠魂義骨與塵埃野馬同沒於丘原  
者蓋亦多矣豈不重可歎惜哉此書雖繁富不及承  
祚之精微然議論忠篤樂道人之善蜀記之可觀未  
有過於此者鏤行於世庶有益於風教云宋元豐戊  
申秋日序



校刻華陽國志凡例

一志字脫誤據史傳證易餘仍闕疑統貽強聞之士

一先賢志遺第二卷巴郡士女計七十八人傳讚故舊逸也宋李叔厓校刻曾未指出今考明闕之庶備搜補

一後賢志以讚冠篇首始次第列傳今取先賢士女志准其例成一家體

一志傳中文較史傳多省竄至不可解或地理名與史傳異者各註引明之本原中未出

一三州士女目錄人多遺逸本列傳中表出

一考常氏士女共得十九人據書未盡及之特錄

出附在卷末

外傳華國志凡例

華陽國志目錄

卷一

卷二

巴志

漢中志

卷三

卷四

蜀志

南中志

卷五

卷六

公孫述劉二牧志

劉先主志

卷七

卷八

劉後主志

大同志

卷九

卷十



李特雄壽勢志

漢中士女

卷十一

後賢志

卷八

卷十二

隆夫志

卷序志

卷六

益梁寧三州先漢以來士女志

卷三

卷四

巴志

冀中志

卷一

卷二

華陽國志目錄

華陽國志卷第一

晉書曰人皇欲出明  
吳郡瑄校

巴志

昔在唐堯洪水滔天  
鯀功無成聖禹嗣興  
導江疏河

百川蠲脩封殖天下  
因古九圍以置九州  
仰稟參伐

俯壤華陽黑水江漢  
爲梁州厥土青黎厥  
田惟下上

厥賦惟下中厥貢璆  
鐵銀鏤砮磬熊羆狐  
狸織皮於

是四奧旣宅九州道  
同六府孔脩庶土交  
正底脊財

賦成貢中國蓋時雍  
之化東被西漸矣歷  
夏殷周九

華陽國志 卷之一  
州牧伯率職周文爲伯西有九國及武王克商并徐  
合青省梁合雍而職方氏猶掌其地辨其土壤甄其  
寶利起於秦帝漢興高祖藉之成業乃改雍曰涼革  
梁曰益故巴漢庸蜀屬益州至魏咸熙元年平蜀始  
分益州巴漢七郡置梁州治漢中以相國參軍中山  
耿黼爲刺史元康六年廣漢益州更割雍州之武都  
陰平荊州之新城上庸魏興以屬焉凡統郡一十一  
縣五十八洛書曰人皇始出繼地皇之後兄弟九人  
分理九州爲九圍人皇居中州制八輔華陽之壤梁  
岷之域是其一圍圍中之國則巴蜀矣其分野輿鬼



東井其君上世未聞五帝以來黃帝高陽之支庶世  
爲侯伯及禹治水命州巴蜀以屬梁州禹娶於塗山  
辛壬癸甲而去生子啓呱呱啼不及視三過其門而  
不入室務在救時今江州塗山是也帝禹之廟銘存  
焉會諸侯於會稽執玉帛者萬國巴蜀往焉周武王  
伐紂實得巴蜀之師著乎尚書巴師勇銳歌舞以凌  
殷人倒戈故世稱之曰武王伐紂前歌後舞也武王  
旣克殷以其宗姬於巴爵之以子古者遠國雖大爵  
不過子故吳楚及巴皆曰子其地東至魚復西至僂  
道北接漢中南極黔涪土植五穀牲具六畜桑蠶麻

紵魚鹽銅鐵丹漆茶蜜靈龜巨犀山雞白雉黃潤鮮  
粉皆納貢之其果實之珍者樹有荔支蔓有辛蒟園  
有芳蒨香茗給客橙葵其藥物之異者有巴戟天椒  
竹木之瓊者有桃支靈壽其名山有塗籍靈臺石書  
邗山其民質直好義土風敦厚有先民之流故其詩  
曰川崖惟平其稼多黍旨酒嘉穀可以養父野惟阜  
丘彼稷多有嘉穀旨酒可以養母其祭祀之詩曰惟  
月孟春獮祭彼崖永言孝思享祀孔嘉彼黍旣潔彼  
儀惟澤蒸命良辰祖考來格其好古樂道之詩曰日  
月明明亦惟其名誰能長生不朽難獲又曰惟德實

寶富貴何常我思古人令問令望而其失在於重遲  
魯鈍俗素樸無造次辨麗之氣其屬有濮賓莒共奴  
獯夷蠻之蠻周之仲世雖奉王職與秦楚鄧爲比春  
秋魯桓公九年巴子使韓服告楚請與鄧爲好楚子  
使道朔將巴客聘鄧鄧南鄙攻而奪其幣巴子怒伐  
鄧敗之其後巴師楚師伐申楚子驚巴師魯莊公十  
八年巴伐楚克之魯文公十六年巴與秦楚共滅庸  
哀公十八年巴人伐楚敗於鄆是後楚主夏盟秦擅  
西土巴國分遠故於盟會希與戰國時嘗與楚婚及  
七國稱王巴亦稱王周之季世巴國有亂將軍蔓子



請師於楚許以三城楚王救巴巴國既寧楚使請城  
蔓子曰藉楚之靈克弭禍難誠許楚王城將吾頭往  
謝之城不可得也乃自刎以頭授楚使王歎曰使吾  
得臣若巴蔓子用城何爲乃以上卿禮葬其頭巴國  
葬其身亦以上卿禮周顯王時楚國衰弱秦惠文王  
與巴蜀爲好蜀王弟苴私親於巴巴蜀世戰爭周慎  
王五年蜀王伐苴侯苴侯奔巴巴爲求救於秦秦惠  
文王遣張儀司馬錯救苴巴遂伐蜀滅之儀貪巴苴  
之富因取巴執王以歸置巴蜀及漢中郡分其地爲  
二縣儀城江州司馬錯自巴涪水取楚商於之地爲

黔中郡秦昭襄王時白虎爲害自秦蜀巴漢患之秦  
王乃重募國中有能煞虎者邑萬家金帛稱之於是  
夷胸忍廖仲藥何射虎秦精等乃作白竹弩於高樓  
上射虎中頭三節白虎常從羣虎瞋恚盡搏煞羣虎  
大吻而死秦王嘉之曰虎歷四郡害千二百人一朝  
患除功莫大焉欲如要王嫌其夷人乃刻石爲盟要  
復夷人頃田不租十妻不筭傷人者論煞人顧死倓  
錢倓蠻夷贖罪貨盟曰秦犯夷輸黃龍一雙夷犯秦輸清酒  
一鍾夷人安之漢興亦從高祖定秦有功高祖因復  
之專以射白虎爲事戶歲出賓錢口四十故世號白

華陽國志 卷之一  
四  
虎復夷一曰板楯蠻今所謂犛頭虎子者也漢高帝  
滅秦爲漢王王巴蜀閬中人范目有恩信方畧知帝  
必定天下說帝爲募發實民要與共定秦秦地旣定  
封目爲長安建章鄉侯帝將討關東實民皆思歸帝  
嘉其功而難傷其意遂聽還巴謂目曰富貴不歸故  
鄉如衣繡夜行耳徙封閬中慈鄉侯目固辭乃封渡  
沔縣侯故世謂三秦亡范三侯也目復除民羅扑咎  
鄂度夕龔七姓不供租賦閬中有渝水實民多居水  
左右天性勁勇初爲漢前鋒陷陣銳氣喜舞帝善之  
曰此武王伐紂之歌也乃令樂人習學之今所謂巴

渝舞也天下既定高帝乃分巴置廣漢郡孝武帝又  
兩割置犍爲郡故世曰分巴割蜀以成犍廣也自時  
厥後五教雍和秀茂挺逸英偉旣多而風謠苟作故  
朝廷有忠貞盡節之臣鄉黨有主文歌詠之音巴郡  
譙君黃仕成哀之世爲諫議大夫數進忠言後違避  
王莽又不事公孫述述怒遣使齎藥酒以懼之君黃  
笑曰吾不省藥乎其子瑛納錢八百萬得免國人作  
詩曰肅肅清節士執德寔固貞違惡以授命沒世遺  
令聲巴郡陳紀山爲漢司隸校尉嚴明正直西虜獻  
眩王庭試之分公卿以爲嬉紀山獨不視京師稱之



巴人歌曰築室載直梁國人以貞真邪娛不揚目枉  
行不動身姦軌僻乎遠理義協乎民巴郡嚴王思爲  
揚州刺史惠愛在民每當遷官吏民塞路攀轅詔遂  
留之居官十八年卒百姓若喪考妣義送者齊錢百  
萬欲以贍王思家其子徐州刺史不受送吏義崇不  
忍持還乃散以爲食食行客巴郡太守汝南應季先  
善而美之乃作詩曰乘彼西漢潭潭其淵君子愷悌  
作民二親沒世遺愛式鏡後人漢安帝時巴郡太守  
連失道國人風之曰明明上天下土是觀帝選元后  
求定民安孰可不念禍福由人願君奉詔惟德日親

永初中廣漢漢中羌反雷及巴郡有馬妙祈妻義王  
元愼妻姬趙蔓君妻華夙喪夫執共姜之節守一醮  
之禮號曰三貞遭亂兵迫匿懼見拘辱三人同時自  
沈於西漢水而沒歿有黃鳥鳴其亡處徘徊焉國人  
傷之乃作詩曰關關黃鳥爰集于樹窈窕淑女是繡  
是黼惟彼繡黼其心匪石嗟爾臨川邈不可獲永建  
中秦山吳資元約爲郡守屢獲豐年民歌之曰習習  
晨風動澍雨潤乎苗我后卹時務我民以優饒及資  
遷去民人思慕又曰望遠忽不見惆悵嘗佗個恩澤  
實難忘悠悠心永懷孝恒帝時河南李盛仲和爲郡

守貪財重賦國人刺之曰狗吠何誼誼有吏來在門  
披衣出門應府記欲得錢語窮乞請期吏怒反見尤  
旋步顧家中家中無可與思往從鄰貸鄰人以言遺  
錢錢何難得令我獨憔悴漢末政衰牧守自擅民人  
思治作詩曰混混濁沼魚習習激清流温温亂國民  
業業仰前脩其德操仁義文學政幹若洛下閎任文  
公馮鴻卿龐宣孟玄文和趙温柔龔升侯楊文義等  
播名立事言行表世者不勝次載者也孝安帝元初  
三年梁州羌反入漢中殺太守董炳擾動巴中中郎  
將尹就討之不克益州諸郡皆起兵禦之三府舉廣

漢王堂爲巴郡太守撥亂致治進賢達士貢孝子嚴  
永隱士黃錯名儒陳髦俊士張璠皆至大位益州刺  
史張喬表其尤異徙右扶風民爲立祠孝桓帝以并  
州刺史秦山但望字伯闔爲巴郡太守勲卹民隱郡  
文學掾宕渠趙芬弘農馮尤墊江龔榮王祈李溫臨  
江嚴就胡良文愷安漢陳禧閬中黃閬江州母成陽  
譽喬就張紹牟存平直等詣望自訟曰郡境廣遠千  
里給吏兼將人從冬往夏還夏單冬複惟踰時之役  
懷怨曠之思其憂喪吉凶不得相見解緩補綻下至  
薪菜之物無不躬買於市富者財得自供貧者無以



自久是以清儉天枉不聞加以水陸艱難山有猛禽  
思迫期會隕身江河投歿虎口咨嗟之歎歷世所苦  
天之應感乃遭明府欲爲更新童兒疋婦懽喜相賀  
將去遠就近釋危蒙安縣無數十民無遠邇恩加未  
生澤及來世巍巍之功勒於金石乞以文書付計椽  
史人鬼同符必獲嘉報芬等幸甚望深納之郡戶曹  
史枳白望曰芬等前後百餘人歷政訟訴未蒙感悟  
明府運機布政稽當皇極爲民庶請命救患德合天  
地澤潤河海開闢以來今遇慈父經曰奕奕梁山惟  
禹甸之有倬其道韓侯受命比隆等盛於斯爲美永

興二年三月甲午望上疏曰謹按巴郡圖經境界南  
北四千東西五千周萬餘里屬縣十四鹽鐵五官各  
有丞史戶四十六萬四千七百八十口百八十七萬  
五千五百三十五遠縣去郡千二百至千五百里鄉  
亭去縣或三四百或及千里土界遐遠令尉不能窮  
詰姦凶時有賊發督郵追案十日乃到賊已遠逃蹤  
迹絕滅罪逮捕證驗文書詰訊卽從春至冬不能究  
訖繩憲未加或遇德令是以賊盜公行姦宄不絕榮  
等及隴西太守馮舍上谷太守陳弘說往者至有劫  
閩中令楊殷終津侯姜昊傷尉蘇鴻彭亭侯孫魯雍

亭侯陳巳殷侯樂普又有女服賊千有餘人布散千里不卽發覺謀成乃誅其水陸覆害煞郡掾枳謝盛塞威張御魚復令尹尋主簿胡直若此非一給吏休謁往還數千閉囚須報或有彈劾動便歷年吏坐踰科恐失冬節侵疑先死如當移傳不能待報輒自刑戮或長吏忿怒冤枉弱民欲赴訴郡官每憚還往太守行桑農不到四縣刺史行部不到十縣郡治江州時有溫風遙縣客吏多有疾病地勢剗險皆重屋累居數有火害又不相容結舫水居五百餘家承三江之會夏水漲盛壞散顛溺死者無數而江州以東濱

江山險其人半楚姿態敦重墊江以西土地平敞精敏輕疾上下殊俗情性不同敢欲分爲二郡一治臨江一治安漢各有桑麻丹漆布帛漁池鹽鐵足相供給兩近京師榮等自欲義出財帛造立府寺不費縣官得百姓懽心孝武以來亦分吳蜀諸郡聖德廣被民物滋繁增置郡土釋民之勞誠聖王之盛業也雖貪大郡以自優暇不忍小民顛顛蔽隔謹具以聞朝議未許遂不分郡分郡之議始於是矣哉順桓之世板楯數反太守蜀郡趙溫恩信降服於是宕渠出九穗之禾胸忍有連理之木光和二年板楯復叛攻害



三蜀漢中州郡連年苦之天子欲大軍出時征役疲  
弊問益州計曹考以方畧益州計曹掾程包對曰板  
楯七姓以射白虎爲業立功先漢本爲義民復除徭  
役但出賓錢口歲四十其人勇敢能戰昔羌數入漢  
中郡縣破壞不絕若線後得板楯來虜彌盡號爲神  
兵羌人畏忌傳語種輩勿復南行後建寧後漢作二  
建和二  
年羌復入漢牧守遑遑復賴板楯破之若微板楯則  
蜀漢之民爲左衽矣前車騎將軍馮緄南征雖授丹  
楊精兵亦倚板楯近益州之亂朱龜以并涼勁卒討  
之無功太守李顥以板楯平之忠功如此本無惡心

長吏鄉亭更賦至重僕役過於奴婢筆楚隆於囚虜  
至乃嫁妻賣子或自剄割陳寃州郡牧守不理去闕  
庭遙遠不能自聞含怨呼天叩心窮谷愁於賦役困  
乎刑酷邑域相聚以致叛戾非有深謀至計僭號不  
軌但選明能牧守益其資穀安便賞募從其利隙自  
然安集不煩征伐也昔中郎將尹就伐羌擾動益部  
百姓諺云虜來尚可尹將殺我就徵還後羌自破退  
如臣愚見權之遣軍不如任之州郡天子從之遣太  
守曹謙宣詔降赦一朝清戢獻帝初平元年征東中  
郎將安漢趙穎建議分巴爲二郡穎欲得巴舊名故

白益州牧劉璋以墊江以上爲巴郡江南龐羲爲太守治安漢以江州至臨江爲永寧郡胸忍至魚復爲固陵郡巴遂分矣建安六年魚復蹇胤白璋爭巴名璋乃改永寧爲巴郡以固陵爲巴東徙羲爲巴西太守是爲三巴於是涪陵謝本白璋求以丹興漢髮二縣爲郡初以爲巴東屬國後遂爲涪陵郡分後屬縣七戶二萬去洛三千七百八十五里東接胸忍西接蔣縣南接涪陵北接安德漢陽

巴子時雖都江州或治墊江或治平都後治閬中其先王陵墓多在枳其畜牧在沮今東突碇下畜沮是

也又立市於龜亭北岸今新市里是也其郡東枳有  
明月碛廣德嶼故巴亦有三峽巴楚數相攻伐故置  
扞關陽關及沔關漢世郡治江州巴水北有枳橘官  
今北府城是也後乃還南城劉先主初以江夏費璠  
爲太守領江州都督後都護李嚴更城大城周迴十  
六里欲穿城後山自汶江通水入巴江使城爲州求  
以五都置巴州丞相諸葛亮不許亮將北征召嚴漢  
中故穿山不逮然造蒼龍白虎門別郡縣倉皆有城  
嚴子農代爲都督農解後梓潼李福爲都督延熙中  
車騎將軍鄧文爲都督治陽關十七年省平都樂城



常安咸熙元年但四縣以鎮西參軍隴西怡思和爲  
太守二部守軍 江州縣郡治塗山有禹王祠及塗  
后祠北水有銘書詞云漢初犍爲張君爲太守忽得  
仙道從此升渡今民曰張府君祠縣下有清水穴巴  
人以此水爲粉則膏暉鮮芳貢粉京師因名粉水故  
世謂江州墮林粉也有荔支園至熟二千石常設厨  
膳命士大夫共會樹下食之縣北有稻田出御米陂  
池出蒲蕪蘭席其冠族有波鈇母謝然慳楊白上官  
程常世有大官也 枳縣郡東四百里治涪陵水會  
土地确瘠時多人士有章常連黎牟楊郡冠首也

臨江縣枳東西百里接胸忍有鹽官在監除二溪一郡所仰其豪門亦家有鹽井又嚴甘文楊杜爲大姓晉初文立實作常伯納言左右楊宗符稱武隆人在吳爲孫氏虎臣也平都縣蜀延熙時省大姓殷呂蔡氏 墊江縣郡西北中水四百里有桑蠶牛馬漢時龔榮以俊才爲荊州刺史後有龔楊趙敏令德爲巴郡太守淳于長寧雅有美貌黎夏杜皆大姓也樂城縣在西州江三百里延熙十七年省常安縣亦省

巴東郡先主入益州改爲江關都尉建安二十一年

以胸忍魚復羊渠

按晉志巴東郡有宕渠

及宜都巫北井六縣

爲固陵郡武陵康立爲太守章武元年胸忍徐慮魚復蹇機以失巴名上表自訟先主聽復爲巴東南郡輔斥爲太守先主征吳於夷道還薨斯郡以尚書令李嚴爲都督造設圍戍嚴還江州征西將軍汝南陳到爲都督到卒官以征北大將軍南陽宗預爲都督預還內領軍襄陽羅獻爲代蜀平獻仍其任拜凌江將軍領武陵太守泰始二年吳大將步闡唐咨攻獻獻保城咨西侵至胸忍故蜀尚書郎巴郡楊宗告急于洛未還獻出擊闡大破之闡咨退獻遷監軍假節

安南將軍封西鄂侯入朝加錫御蓋朝服吳武陵太守孫恢寇南浦安蠻護軍楊宗討之退走因表以宗爲武陵太守任南浦誘卹武陵蠻夷得三縣初附良獻卒以捷爲太守天水楊攸爲監軍攸遷梁州刺史朝議以唐彬及宗爲代晉武帝問散騎常侍文立曰彬宗孰可用立對曰彬宗俱立事績在西不可失者然宗才誠佳有酒嗜彬亦其人性在財欲惟陛下裁之帝曰財欲可足酒嗜難改遂用彬爲監軍加廣武將軍迄吳平巴東後省羊渠置南浦晉太康初將巫北井還建平但五縣去洛二千五百里東接建平南



接武陵西接巴郡北接房陵奴獍夷蠻之蠻民 魚

復縣郡治公孫述更名白帝章武二年改曰永安咸

熙初復有橘官又有澤水神天旱鳴鼓於傍即雨也

胸忍縣西二百九十里水道有東陽下瞿數灘山

有大小石城並靈壽木鹽井靈龜咸熙元年獻靈龜

於相府大姓扶先徐氏漢時有扶徐荆州着石楚訪

有弜頭白虎復夷者也

着石楚訪四字未詳○弜其雨切又翹移切弓強貌又渠

羈切又渠良切

文一重音三

漢豐縣建安二十一年置在郡西

北彭溪源 南浦縣郡南三百里晉初置主夷郡郡

與楚接人多勁勇少文學有將帥材

涪陵郡巴之南鄙從枳南入折丹涪水本與楚商於  
之地接秦將司馬錯由之取楚商於地爲黔中郡也  
後恒有都尉守之舊屬縣五去洛五千一百七十里  
東接巴東南接武陵西接牂牁北接巴郡土地山險  
水灘人多戇勇多獠蠻之民縣邑阿黨鬪訟必死無  
蠶桑少文學惟出茶丹漆蜜蠟漢時赤甲軍常取其  
民蜀丞相亮亦發其勁卒三千人爲連弩士遂移家  
漢中延熙十三年大姓徐巨反車騎將軍鄧芝討平  
之見玄猿緣其山芝性好弩手自射猿中之猿子拔  
其箭卷木葉塞其創芝嘆曰嘻吾傷物之性其將死

矣乃移其豪徐蘭謝范五千家於蜀爲獵射官分羸  
弱配督將韓蔣名爲助郡軍遂世掌部曲爲大姓晉  
初移弩士于馮翊蓮勺其人性質直雖徙他所風俗  
不變故迄今有蜀漢關中涪陵其爲軍在南方者猶  
存山有大龜其甲可卜其緣可作义世號靈义出涪  
陵縣郡治 丹興蜀時省山出名丹 漢平縣延熙  
十三年置 萬寧縣孝靈帝時本名永寧 漢髮縣  
有鹽井諸縣北有獾蚤又有蟾夷也

巴西郡屬縣七去洛二千八百一十五里東接巴郡  
南接梓潼北接梁西城土地山原多平有牛馬桑蠶

人自先漢以來傀偉倣儻冠冕三巴及郡分後叔布  
榮始周羣父子程公弘等或學兼三才或精秀竒逸  
其次馬盛衡承伯才藻清妙龔德緒兄弟英氣曄然  
黃公衡應權通變馬德信王子均勻孝興張伯岐建  
功立事劉二主之世稱美荆楚乃先漢以來馮車騎  
范鎮南皆植斯鄉故曰巴有將蜀有相也及晉譙侯  
修文於前陳君煥炳於後並遷雙固倬羣穎世甄在  
傳記縉紳之徒不勝次載焉 閬中縣郡治有彭池  
大澤名山靈臺見文緯書識大姓有三狐五馬蒲趙  
任黃嚴也 南充國縣和帝時置有鹽井大姓侯譙



氏 安漢縣號出人士大姓陳范閻趙 平州縣其

二縣爲郡

宕渠郡延熙中置以廣漢王士爲太守郡建九年省  
永興元年李雄復置今遂爲郡長老言宕渠蓋爲故  
賓國今有賓城盧城秦始皇時有長人二十五丈見  
宕渠秦史胡毋敬曰是後五百年外必有異人爲大  
人者及雄之王祖世出自宕渠有識者皆以爲應之  
先漢以來士女賢貞縣民車騎將軍馮緄大司農玄  
賀大鴻臚龐雄桂陽太守李温等皆建功立事有補  
於世緄温各葬所在常以三月二子之靈還鄉里水

暴漲郡縣吏民莫不於水上祭之其列女節義在先  
賢志 宕渠縣郡治有鐵官石蜜山圖所採也 漢  
昌縣和帝時置大姓勾氏 宣漢縣今省 右巴國  
分爲五郡二十三縣

譏曰巴國遠世則黃炎之支封在周則宗姬之戚親  
故於春秋班倅秦楚示甸衛也若蔓子之忠烈范目  
之果毅風惇俗厚世挺名將斯乃江漢之含靈山岳  
之精爽乎觀其俗足以知其敦一矣昔沙麓崩十偃  
言其後當有聖女興元城郭公謂王翁孺屬當其時  
故有政君李雄宕渠之廝伍略陽之黔首耳起自流



華陽國志卷第二

晉常璩著

明吳瑄校

漢中志

漢中郡本附庸國蜀周赧王二年秦惠文王置郡因水名也漢有二源東源出武都氐道漾山因名漾禹貢流漾爲漢是也西源出隴西蟠冢山會白水經葭萌入漢始源曰沔故曰漢沔在詩曰滔滔江漢南國之紀其應上昭于天又曰惟天有漢其分野與巴蜀同占其地東接南郡南接廣漢西接隴西陰平北接



秦川厥壤沃美賦貢所出略侔三蜀六國時楚強盛  
略有其地後爲秦恒成爭地漢高帝旣克秦獲子嬰  
項羽封高帝爲漢王王巴蜀三十一縣帝不悅丞相  
蕭何謀曰雖王漢之惡不猶愈於歿乎且語曰天漢  
其稱甚美夫能屈於一人之下則伸於萬乘之上者  
湯武是也願大王王漢中撫其民以致賢人收用巴  
蜀還定三秦天下可圖也帝從之都南鄭及項籍弑  
義帝高帝東伐蕭何常居守漢中足食足兵旣定三  
秦蕭何鎮關中資其衆卒平天下以田叔爲漢中守  
屬縣十一去洛一千九十一里叔旣饋以軍饟又致

名材立宮室帝嘉之後爲魯相然以帝業所興不封  
藩王自叔之後世脩文教有倣儻之士異人竝挺鄧  
公抗言於孝景之朝以明忠枉之情張騫特以蒙險  
遠爲孝武帝開緣邊之地賓沙越之國致大宛之馬  
入南海之象而車渠瑪瑙珊瑚琳碧麝寶明珠玳瑁  
虎魄水晶琉璃火浣之布蒲桃之酒筇竹蒟醬殊方  
竒玩盈於市朝振揚威靈被於幽裔遂登九列杖節  
繡衣剖符博望谷口子真秉箕頽之操湛然岳立不  
營不求德聲邁流楊王孫應至人之概自建武以後  
羣儒修業開按圖緯漢之宰相當出坤鄉於是司徒

李公屢登七政太傅子堅奕世論道其珪璋瑚璉之  
器則陳伯臺季季子申伯之徒文秀瑋曄其州牧郡  
守冠蓋相繼於西州爲盛蓋濟濟焉莽時公孫述據  
蜀跨有漢中當秦隴之徑每懼其害安帝永初二年  
陰平武都羌反入漢中殺太守董炳沒略吏民四年  
羌復來太守鄭廩出屯褒中欲與羌戰主簿段崇陳  
禪以爲但可堅守來虜乘勝其鋒不可當廩不從戰  
敗績崇與門下吏王宗原展及崇子勃兄子伯生力  
戰捍廩并命功曹程信素居守馳來赴難冒寇殞殪  
廩虜遂太盛天子乃拜巴郡陳禪爲漢中太守虜素

憚禪更來盤結禪知攻守未可卒下而年荒民困乃  
矯詔赦之大小咸服既誅其亂首天子善之徙禪左  
馮翊太守程信怨恥乃結故吏冠蓋子弟嚴孳李容  
姜濟陳巴曹廉勾矩劉旌等二十五人誓志報羌各  
募壯士豫結同歿以待寇太守鄧成命信爲五官孳  
等門下官屬元和二年羌復來巴郡板楯救之信等  
將其士卒力奮討大破之信被八創二十五人戰歿  
自是後羌不敢南向五年天子下詔褒歎信崇等賜  
其家穀各千斛宗展孳等家穀各五百斛列畫東觀  
每新太守到必先存問其家以羌畏服陳禪拜禪子



澄漢中太守漢末沛國張陵學道於蜀鶴鳴山造作  
道書自稱太清玄元以惑百姓陵歿子衡傳其業衡  
死子魯傳其業魯字公祺以鬼道見信於益州牧劉  
焉魯母有少容往來焉家初平中以魯爲督義司馬  
往漢中斷谷道魯旣至行寬惠以鬼道教立義舍置  
義米義肉其中行者取之量腹而已不得過過多云  
鬼病之其市肆價平亦然犯法者三原而後行刑學  
道未信者謂之鬼卒後乃爲祭酒巴漢夷民多便之  
其供通限出五斛米故世謂之米道扶風蘇固爲漢  
中太守魯遣其黨張脩攻固城固人陳調素遊俠學

兵法固以爲門下掾說固守扞禦寇之術固不能用  
踰墻走投南鄭趙嵩嵩將俱逃賊盛固遣嵩求隱避  
處嵩未還固又令鈴下偵賊賊得鈴下遂得殺固嵩  
痛憤仗劍直入調亦聚其賓客百餘人攻修戰死魯  
遂有漢中數害漢使焉上書言米賊斷道至劉焉子  
璋爲牧時魯益驕恣璋怒建安五年殺魯母弟魯率  
巴夷杜濩朴胡袁約等叛爲讐敵魯時使使漢朝亦  
慢僞帝室以亂不能征就拜中郎將漢寧太守不置  
長吏皆以祭酒爲治民璋數遣龐羲李思等討之不  
能克而巴夷日叛乃以羲爲巴西太守又遣楊懷高

沛守關頭請劉先主討魯先主更襲取璋二十年魏武帝西征魯魯走巴中先主將迎之而魯功曹巴西閻團說魯北降歸魏武贊以大事宜附託不然西結劉備以歸之魯勃然曰寧爲曹公作奴不爲劉備上客遂委質魏武武帝拜魯鎮南將軍封襄平侯又封其五子皆列侯時先主東下江安巴漢稽服魏武以巴夷王杜濩朴胡袁約爲三巴太守留征西將軍夏侯淵及張郃益州刺史趙顛等守漢中遷其民於關隴二十四年春先主進軍攻漢中至定軍淵郃顛來戰大爲先主所破將軍黃忠斬淵顛首魏武帝復西

征先主先主曰孟德雖來無能爲也我必有漢川矣  
先主遂爲漢中王將還成都當得重將以鎮漢中衆  
皆以必張飛張飛心亦自許先主乃以牙門義陽魏  
延爲鎮遠將軍漢中太守先主大會羣臣問延曰今  
委卿以漢中卿居之若何對曰若曹操舉天下而來  
請爲大王拒之若偏將十萬而來請爲大王吞之衆  
壯其言初魏武之留淵郤也以雞肋示外外人莫察  
惟主簿楊修知之故曰夫雞肋棄之如可惜食之無  
所得以比漢中也是後處蜀魏界固險重守自丞相  
大司馬大將軍皆鎮漢中蜀平梁州治沔陽



大康中晉武帝子漢王迪受封更曰漢國郡但六縣  
南鄭縣郡治周貞王十六年秦厲公城之有池水  
從旱山來入沔大姓李程趙氏 沔陽縣州治有鐵  
官又有度水水有二源一曰清檢二曰濁檢有魚穴  
清水出鱖濁水出鮒常以二月八月取蜀丞相諸葛  
亮葬定軍山 褒中縣孝昭帝元鳳六年置本都尉  
治也山名扶木有唐公房祠也 城固縣蜀時以沔  
陽爲漢城城固爲樂城蒲池縣 西鄉縣  
魏興郡本漢中西城縣哀平之世縣民錫光字長冲  
爲交州刺史徙交趾太守王莽篡位拒郡不附莽方

有事海內未以爲意尋值所在兵遂起自守更始卽  
祚正其本官世祖嘉其忠節徵拜爲大將軍朝侯祭  
酒封鹽水侯後漢中數寇亂縣土獨存漢季世別爲  
郡建安二十四年劉先主命宜都太守孟達從秭歸  
北伐房陵上庸自漢中又遣副軍中郎將劉封乘沔  
水會達上庸以申耽弟儀爲建信將軍西城太守達  
耽降魏黃初二年文帝轉儀爲魏興太守封鄖鄉侯  
蜀平遂治西城屬縣六戶萬去洛一千七百土地險  
隘其人半楚風俗畧與荊州沔中郡同 西城縣郡  
治元康元年封越騎校尉蜀郡何攀爲公國也 錫

縣 安康縣 興晉縣晉置 鄖鄉縣本名長利縣

縣有鄖鄉 洵陽縣洵水所出

上庸郡故庸國楚與巴秦所共滅者也秦時屬蜀後屬漢中漢末爲上庸郡建安二十四年孟達劉封征上庸上庸太守申耽稽服遣子弟及宗族詣成都先主拜耽征北將軍封鄖鄉侯仍郡如故黃初中降魏魏文帝拜耽懷集將軍徙居南陽省上庸并新城孟達誅後復爲郡屬縣五戶七千去洛一千七百里

上庸縣郡治 北巫縣 安樂縣咸熙元年爲公國

封劉後主也 武陵縣 安富縣 微陽縣

晉書上庸郡有

上廉無  
安樂

新城郡本漢中房陵縣也秦始皇徙呂不韋舍人萬家於房陵以其隘地也漢時宗族大臣有罪亦多徙此縣漢末以爲房陵郡建安二十四年孟達征房陵殺太守蒯祺進平三郡與劉封不和封奪達鼓吹關羽圍樊城求助於封達封達以新據山郡未可擾動爲辭羽爲吳所破殺達旣忿封又懼先主見責遂拜書先主告叛降魏魏文帝善達姿容觀以爲散騎常侍建武將軍襲劉封封敗走達據房陵文帝合三郡爲新城以達爲太守後蜀丞相諸葛亮將北伐招



達爲外援故貽書曰嗟乎孟子度邇者劉封侵凌足  
下以傷先帝待士之望慨然永歎每存天下平素之  
志豈虛托名載策者哉都護李嚴亦與書曰吾與孔  
明並受遺詔思得良伴吳王孫權亦招之達遂背魏  
通吳蜀表請馬弩於文帝撫軍司馬宣王以爲不可  
許帝曰吾爲天下主義不先負人當使吳蜀知吾心  
乃多與之過其所求明帝太和初達叛魏歸蜀時宣  
王屯宛知其情乃以書喻之曰將軍昔棄劉備託身  
國家委將軍以疆場之任任將軍以圖蜀之事可謂  
心貫白日蜀人愚智莫不切齒於將軍諸葛亮欲相

破惟苦無路耳模之所言

郭模亮遺詐降洩孟達謀者

非小事也

亮豈輕之而令宣露此殆易知耳達乃以書與亮曰  
宛去洛八百去此千二百里聞吾舉事當表上天子  
比相反覆一月間也則吾城已固諸軍足辦則吾所  
在深險司馬公必不自來諸將來吾無患矣及兵到  
達又告亮曰吾起事八日而兵至城下何其神速也  
亮以其數反覆亦不救遂爲宣王所誅滅宣王分爲  
三郡新城屬縣四戶二萬去洛一千六百里 房陵  
縣有維山維水所出東入瀘 瀘字疑誤 ○ 又按巴漢志新城郡  
有維水所出亦云東入瀘 沔鄉縣 昌魏縣 緩陽縣 右三

郡漢中所分也在漢之東故蜀漢謂之東三郡蜀時  
爲魏屬荊州晉元康六年始還梁州山水艱阻有黃  
金子午馬聰建鼓之阻又有作道九君搏土作人處  
而其記及漢中記不載又不爲李雄所據據識其大  
梗概未能詳其小委曲也

梓潼郡本廣漢屬縣也建安十八年劉先主自葭萌  
南攻州牧劉璋留中郎將南郡霍峻守葭萌城張魯  
遣將楊帛誘峻求共城守峻曰小人頭可得城不可  
得也帛退劉璋將向存扶禁由巴閬水攻峻歲餘不  
能克峻衆才八百人存衆萬計更爲峻所破敗退走

成都既定先主嘉峻功二十三年分廣漢置梓潼郡  
以峻爲太守屬縣六戶萬去洛二千八百三十八里  
東接巴西南接廣漢西接陰平北接漢中土地出金  
銀丹漆藥蜜也世有雋彥人侔於巴蜀梓潼縣郡  
治有五婦山故蜀五丁士所拽虵崩山處也有善板  
祠一曰惡子民歲上雷杼十枚歲盡不復見云雷取  
去四姓文景雍鄧者也涪縣去成都三百五十里  
水通于巴爲蜀東北之要蜀時大將軍鎮之有宕田  
平稻田孱水出孱山其源出金銀鑛洗取火融合之  
爲金銀陽泉出石丹大司馬蔣琬葬此大姓楊杜李



人士多見耆舊也

晉壽縣本葭萌城劉氏更曰漢

壽水通于巴西又入漢川有金銀鑛民今歲歲取洗  
之蜀亦大將軍鎮之漆藥蜜所出也大將軍費禕葬  
此山大姓葬此者多白水縣有關尉故州牧璋將  
楊懷高沛守也廣漢縣德陽縣有劔閣道三  
十里至險有閣尉桑下兵民也

武都郡本廣漢西部都尉治也元鼎六年別爲郡屬  
縣九戶萬去洛一千八百七十八里東接梓潼西接  
天水北接始平土地嶮岨有麻田氏僂多羌戎之民  
其人半秦多勇戇出名馬牛羊漆蜜有瞿堆百頃嶮

勢氏叟常依之爲叛漢世數征討之分徙其羌遠至  
酒泉燉煌其攻戰壘戍處所亦多建安二十四年先  
主遣將軍雷同吳蘭平之爲魏將曹洪所破殺魏益  
州刺史天水楊阜治此郡阜以濱蜀境移其氏叟於  
汧雍及天水略陽建興七年丞相諸葛亮遣護軍陳  
戒伐之遂平武都陰平二郡還屬益州魏將夏侯淵  
張郃徐晃征伐常由此郡而蜀丞相亮及魏延姜維  
等多從此出秦川遂荒無晉民其氏叟楊僕屬魏魏  
遙置其郡屬蜀蜀平屬雍州太康六年還梁州八年  
氏叟齊萬年反郡罹其寇晉民流徙入蜀及梁州永

嘉初天水氐使楊茂搜率種人爲寇保據其郡貢獻  
長安愍帝以胡寇方盛欲懷來戎翟拜驃騎將軍左  
賢王劉曜破長安丞相平昌公上隴據天水茂搜數  
饋平昌公拜茂搜長子難敵征南將軍少子堅頭龍  
驤將軍種衆彊盛東破梁州南連李雄威服羌戎時  
平昌公爲劉曜所破陳安作賊于時并氐使如一國  
茂搜死敵堅代爲主數歲曜自攻武都敵堅南奔雄  
至晉壽遣子爲質又厚賂雄兄晉壽守將稚曜不獲  
敵堅引還武都恃嶮驕慢攻走雄陰平太守羅演演  
稚舅也稚忿恚白兄舍與雄求征之雄使舍將稚數

千人攻之時敵妻死葬於陰平含稚征至下辨入武

街城以深入無繼盡為氏使所破煞敵堅歿于磐毅

復代為主按下列縣名有赤亭咸康四年敵從弟初煞磐毅兄

弟代為主迄今自茂搜父子之結據也通晉家及李

雄劉曜石勒石虎張駿皆稱臣奉貢受其官號所向

用其官及其年號下辨縣郡治一曰武街 武都縣

東漢水所出有天地澤一本云天池澤 上祿故道縣 河

池縣 泉街縣水入沮合漢也 沮縣河池水所出

東狼谷也上祿故道二縣名俱屬武都郡 平樂縣 脩武縣 嘉

陵縣



陰平郡本廣漢北部都尉永平後羌虜數反遂置爲郡屬縣四戶萬去洛二千三百四十四里東接漢中南接梓潼西接隴西北接酒泉土地山嶮人民剛勇多氏僂有黑白水羌紫羌胡虜風俗所出與武都畧同漢安帝永初二年羌反燒郡城郡人退住白水會漢陽諸羌反溢入漢殺太守漢陽杜琦自稱將軍叛亂廣漢郡屯葭萌漢使御史大夫唐喜討琦進討羌經年不下詔賜死更遣中郎將尹就討羌亦無功諸郡太守皆屯涪元初五年巴郡板楯軍救漢中漢中大破羌羌乃退郡復治置助郡都尉劉先王之入漢

中也爭二郡不得建興七年諸葛亮始命陳戒平之  
魏亦遙置其郡屬雍州自景谷有步道徑江由左儋  
行出涪鄧艾從之伐蜀元康六年還蜀梁州永嘉末  
太守王鑿粗暴郡民毛深左騰等逐出之相率降李  
雄晉民盡出蜀氏羌爲楊茂搜所占有陰平縣郡  
治漢曰陰平道也 甸氏縣有白水出徼外入漢

平武縣有關尉自景谷有步道徑江由左儋出涪鄧  
艾伐蜀道也則主時置義守號關尉 剛氏縣涪水  
所出有金銀鑛 右梁州

譔曰漢沔彪炳靈光上照在天鑿爲雲漢於地畫爲

梁州而皇劉應之洪祚攸長蕭公之云不亦宜乎

華陽國志卷第二

華陽國志卷第三

晉

常璩著

明

吳琯校

蜀志

蜀之爲國肇於人皇與巴同囿至黃帝爲其子昌意娶蜀山氏之女生子高陽是爲帝嚳封其支庶於蜀世爲侯伯歷夏商周武王伐紂蜀與焉其地東接于巴南接于越北與秦分西奄峨嶓地稱天府原曰華陽故其精靈則井絡垂耀江漢遵流河圖括地象曰岷山之下爲井絡帝以會昌神以建福夏書曰岷山



導江東別爲沱泉源深盛爲四瀆之首而分爲九江  
其寶則有璧玉金銀珠碧銅鐵鉛錫赭堊錦繡罽毼  
犀象氈毼丹黃空青桑漆麻紵之饒滇獠寶爇僮僕  
六百之富其卦值坤故多斑綵文章其辰值未故尚  
滋味德在少昊故好辛香星應輿鬼故君子精敏小  
人鬼黠與秦同分故多悍勇在詩文王之化被乎江  
漢之域秦幽同詠故有夏聲也其山林澤漁園囿果  
瓜四時代熟靡不有焉有周之世限以秦巴雖奉王  
職不得與春秋盟會君長莫同書軌周失綱紀蜀先  
稱王有蜀侯蠶叢其目縱始稱王死作石棺石槨國

人從之故俗以石棺椁爲縱目人家次王曰栢灌次  
王曰魚鳧魚鳧王田於湔山忽得仙道蜀人思之爲  
立祠後有王曰杜宇教民務農一號杜主時朱提有  
梁氏女利遊江源宇悅之納以爲妃移治郫邑或治  
瞿上七國稱王杜宇稱帝號曰望帝更名蒲卑自以  
功德高諸王乃以褒斜爲前門熊耳靈關爲後戶玉  
壘峨眉爲城郭江潛綿洛爲池澤以汶山爲畜牧南  
中爲園苑會有水災其相開明決玉壘山以除水害  
帝遂委以政事法堯舜禪授之義遂禪位于開明帝  
升西山隱焉時適二月子鵲鳥鳴故蜀人悲子鵲鳥

鳴也巴亦化其教而力農務迄今巴蜀民農時先祀  
杜主君開明位號曰叢帝叢帝生盧帝盧帝攻秦至  
雍生保子帝帝攻青衣雄張獠獲九世有開明帝始  
立宗廟以酒曰醴樂曰荆人尚赤帝稱王時蜀有五  
丁力士能移山舉萬鈞每王薨輒立大石長三丈重  
千鈞爲墓志今石笋是也號曰笋里未有謚列但以  
五色爲王故其廟稱青赤黑黃白帝也開明王自夢  
廓移乃徙治成都周顯王之世蜀王有褒漢之地因  
獵谷中與秦惠王遇惠王以金一笥遺蜀王王報珍  
玩之物物化爲土惠王怒羣臣賀曰天奉我矣王將

得蜀土地惠王喜乃作石牛五頭朝瀉金其後曰牛  
便金有養卒百人蜀人悅之使使請石牛惠王許之  
乃遣五丁迎石牛旣不便金怒遣還之乃嘲秦人曰  
東方牧犢兒秦人笑之曰吾雖牧犢當得蜀也武都  
有一丈夫化爲女子美而豔蓋山精也蜀王納爲妃  
不習水土欲去王必留之乃爲東平之歌以樂之無  
幾物故蜀王哀之乃遣五丁之武都擔土爲妃作冢  
蓋地數畝高七丈上有石鏡今成都北角武擔是也  
後王悲悼作更邪歌龍歸之曲其親埋作冢者皆立  
方石以志其墓成都縣內有一方折石圍可六尺長



三丈許去城北六十里曰毗橋亦有一折石亦如之  
長老傳言丁士擔土擔也公孫述時武擔石折故治  
中從事任文公歎曰噫西方智士歿吾其應之歲中  
卒周顯王二十二年蜀侯使朝秦秦惠王數以姜女  
進蜀王感之故朝焉惠王知蜀王好色許嫁五女於  
蜀蜀遣五丁迎之還到梓潼見一大蛇入穴中一人  
覽其尾掣之不禁至五人相助大呼拽蛇山崩時壓  
殺五人及秦五女并將從而山分爲五嶺直頂上有  
平石蜀王痛傷乃登之因命曰五婦冢山川平石上  
爲望婦塚作思妻臺今其山或名五丁冢蜀王別封

弟葭萌於漢中號苴侯命其邑曰葭萌焉苴侯與巴  
王爲好巴與蜀讎故蜀王怒伐苴侯苴侯奔巴求救  
於秦秦惠王方欲謀楚羣臣議曰夫蜀西僻之國戎  
狄爲鄰不如伐楚司馬錯中尉田真黃曰蜀有桀紂  
之亂其國富饒得其布帛金銀足給軍用水通于楚  
有巴之勁卒浮大船舶以東向楚楚地可得得蜀則  
得楚楚亡則天下并矣惠王曰善周慎王五年秋秦  
大夫張儀司馬錯都尉墨等從石牛道伐蜀蜀王自  
於葭萌拒之敗績王遜走至武陽爲秦軍所害其傳  
相及太子退至逢鄉死於白鹿山開明氏遂亡凡王

蜀十二世冬十月蜀平司馬錯等因取苴與巴焉周  
赧王元年秦惠王封子通國爲蜀侯以陳壯爲相置  
巴郡以張若爲蜀國守戎伯尚強乃移秦民萬家實  
之三年分巴蜀置漢中郡六年陳壯反殺蜀侯通國  
秦遣庶長甘茂張儀司馬錯復伐蜀誅陳壯七年封  
子惲爲蜀侯司馬錯率巴蜀衆十萬大舶舩萬艘米  
六百萬斛浮江伐楚取商於之地爲黔中郡五年惠  
王二十七年儀與若城成都周迴十二里高七丈郫  
城周迴七里高六丈臨邛城周迴六里高五丈造作  
下倉上皆有屋而置觀樓射圃成都縣本治赤里街

若徙置少城內城營廣府金置鹽鐵市官并長丞修  
整里闐市張列肆與咸陽同制其築城取土去城十  
里因以養魚今萬歲池是也惠王二十七年也城北  
又有龍壩池城東有千秋池城西有柳池冬夏不竭  
其園囿因之平陽山亦有池澤蜀之漁畋之地也赧  
王十四年蜀侯惲祭山川獻饋於秦孝文王惲後母  
害其寵加毒以進王王將嘗之後母曰饋從二千里  
來當試之王與近臣近臣即斃文王大怒遣司馬錯  
賜惲劔使自裁惲懼夫婦自殺秦誅其臣郎中令嬰  
等二十七人蜀人葬惲郭外十五年王封其子綰爲



蜀侯十七年聞憚無罪冤枉歿使使喪入葬之郭內  
初則炎旱三月後又霖雨七月車溺不得行喪車至  
城北門忽陷入地中蜀人因名北門曰咸陽門爲蜀  
侯憚立祠其神有靈能興雲致雨水旱禱之三十年  
疑蜀侯綰反王復誅之但置蜀守張若因取竿及其  
江南地焉周滅後秦孝文王以李冰爲蜀守冰能知  
天文地理謂汶山爲天彭門乃至湔及縣見兩山對  
如闕因號天彭闕髣髴若見神遂從水上立祀三所  
祭用三牲珪璧沈瀆漢興數使使者祭之水乃壅江  
作壩穿郫江檢江別支流雙過郡下以行舟舡岷山

多梓柏大竹頽隨水流坐致材木功省用饒又溉灌  
三郡開稻田於是蜀沃野千里號爲陸海旱則引水  
浸潤雨則杜塞水門故記曰水旱從人不知饑饉時  
無荒年天下謂之天府也外作石犀五頭以厭水精  
穿石犀溪於江南命曰犀牛里後轉置犀牛二頭一  
在府市市橋門今所謂石牛門是也一在淵中乃自  
前堰上分穿羊摩江灌江西於玉女房下自涉郵作  
三石人立三水中與江神要水竭不至足盛不沒肩  
時青衣有沫水出蒙山下伏行地中會江南安觸山  
脇瀾崖水脈漂疾破害舟船歷代患之水發卒鑿平

溷崖通正水道或曰冰鑿崖時水神怒冰乃操刀入  
水中與神鬪至今蒙福熨道有故蜀王兵闌亦有神  
作大灘江中其崖嶄峻不可鑿乃積薪燒之故其處  
懸崖有赤白五色冰又通笮通汶井江徑臨邛與蒙  
溪分水白木江會武陽天社山下合江又導洛通山  
洛水或出瀑口經什邡郫別江會新都大渡又有綿  
水出紫巖山經縣竹入洛東流過資中會江陽皆漑  
灌稻田膏潤稼穡是以蜀川人稱郫繁曰膏腴綿洛  
爲浸沃也又識齊水脉穿廣都鹽井諸陂池蜀於是  
盛有養生之饒焉漢祖自漢中出三秦伐楚蕭何發

蜀漢米萬船而給助軍糧收其精銳以補傷疾雖王  
有巴蜀南中不賓也高祖六年始分置廣漢郡高后  
六年城棘道開青衣孝文帝末年以廬江文翁爲蜀  
守穿湔江口溉灌繁田千七百頃是時世平道治民  
物阜康承秦之後學校陵夷俗好文刻翁乃立學選  
吏子弟就學遣雋士張叔等十八人東詣博士受七  
經還以教授學徒鱗萃蜀學比於齊魯巴漢亦立文  
學孝景帝嘉之今天下郡國皆立文學因翁倡其教  
蜀爲之始也孝武帝皆徵入叔爲博士叔明天文災  
異始作春秋章句官至侍中揚州刺史元光四年置



蜀四部都尉元鼎二年立成都十八郭於是郡縣多  
城觀矣六年分廣漢置犍爲郡元封元年分犍爲置  
牂柯郡二年分牂柯置益州郡六年以廣漢西部蜀  
南郡爲越雋郡北部冉龐爲汶山郡邛笮爲沉黎郡  
合置二十餘縣天漢四年罷沉黎置兩部都尉一治  
旄牛主外羌一治青衣漢民孝宣帝地節三年罷汶  
山郡置北部都尉時又穿臨邛蒲江鹽井二十所增  
置鹽鐵官蜀自漢興至于哀平皇德隆熙牧守仁明  
宣德立教風雅英偉之士命世挺生感於帝思於是  
璽書交馳於斜谷之南玉帛踐乎梁益之鄉而西秀

彥盛或龍飛紫闈允陟璿璣或盤桓利居經綸皓素  
故司馬相如耀文上京楊子雲齊聖廣淵嚴君平經  
德秉哲王子淵才高名雋李仲元湛然岳立林翁儒  
訓誥玄遠何君公謨明弼諧王延世著勳河平其次  
楊壯何顯得意之徒恂恂焉斯蓋華岷之靈標江漢  
之精華也故益州刺史王褒悅之命王褒作中和頌  
令胄子作鹿鳴聲歌之以上孝宣帝帝曰此盛德之  
事朕何以堪之卽拜爲郎降及建武以後爰迄靈獻  
文化彌純道德彌臻趙志伯三遷台衡子柔兄弟相  
繼元輔司空張公宣融皇極太常仲經爲天下材英

廣陵太守張文紀號天下整理武陵太守杜伯持能  
決天下所疑王稚子震名華夏常茂尼流芳京尹其  
次張俊秦宓英辯博通董扶楊厚究知天文任定祖  
訓徒同風洙泗其孝悌則有姜詩感物寤靈禽堅精  
動殊俗隗通石橫中流吳順赤烏來巢其忠貞則王  
皓隕身不傾朱遵絆馬必死王累懸頸州門張任守  
節故主其淑媛則有元常紀常程玦及吳幾先絡耶  
之二姚殷氏兩女趙公夫人自時厥後龍宗有鱗鳳  
集有翼摺紳邵右之疇比肩而進世載其美是以四  
方述作有志者莫不仰其高風範其儀則擅名八區

爲世師表矣其忠臣孝子烈士貞女不勝詠述雖魯  
之詠洙泗齊之禮稷下未足尚也故漢徵八士蜀有  
四焉然秦惠文始皇克定六國輒徙其豪俠於蜀資  
我豐土家有鹽銅之利戶專山川之材居給人足以  
富相尚故工商致結駟連騎豪族服王侯美衣娶嫁  
設太牢之厨膳歸女有百兩之徒車送葬必高墳瓦  
椁祭奠而羊豕夕牲贈襚兼加贈賻過禮此其所失  
原其由來染秦化故也若卓王孫家僮千數程鄭各  
八百人而郟公從禽巷無行人簫鼓歌吹擊鐘肆懸  
富侔公室豪過田文漢家食貨以爲稱首蓋亦池沃



華陽國志 卷之三  
九  
土豐奢侈不期而至也

蜀郡州治屬縣五戶漢廿七萬晉六萬五千去洛三千一百二十里東接廣漢北接汶山西接漢嘉犍爲州治大城郡治少城西南兩江有七橋直西門郫江中冲治橋西南石牛門曰市橋下石犀所潛淵中也城南曰江橋南渡流曰萬里橋西上曰夷里橋上曰笮橋橋從冲治橋西出折曰長昇橋郫江上西有永平橋長老傳言李冰造七橋上應七星故世祖謂吳漢曰安軍宜在七星間城北十里有昇仙橋有送客觀司馬相如初入長安題市門曰不乘赤車駟馬不

過汝下也其郛西上有永平橋於是江衆多作橋故

蜀立里多以橋為名按水經注冲治作冲里其大江自渝堰下

至犍為有五津始曰白華津二曰里津三曰江首津

四曰涉頭津劉璋時召東州民居此改曰東州頭五

曰江南津入犍有漢安橋玉津東沮津津亦七始

文翁立文學精舍講堂作石室一作玉室在城南永

初後堂遇火太守陳留高朕更修立又增造二石室

州奪郡文學為州學郡更於夷里橋南岸道東邊起

文學有女墻其道西城故錦官也錦江織錦濯其中

則鮮明濯他江則不好故命曰錦里也西又有車官

城其城東西南北皆有軍營壘城其郡四出大道道實二十里有衢今言十八里者昔蜀王女未嫁年二十亡王哀悼不忍言二十故言十八也王女墓在城北今王女陌是也其太守著德垂績者前漢莫聞建武以來有第五倫廉范叔度特垂惠愛百姓歌之曰廉叔度來何暮來時我單衣去時重五袴其後漢中趙瑤自扶風太守來之郡司空張溫謂曰第五伯魚從蜀郡爲司空今掃吾第以待足下瑤與廣漢陳留高朕亦播文教太尉趙公初爲九卿適子甯還蜀朕命爲文學撰鄉俗記亦能屈士如此廣漢王商犍爲

楊洪皆見詠懷及晉建西夷府太守多遷爲西夷校尉亦遷益州刺史

成都縣郡治有十二鄉五部尉漢戶七萬晉三萬七千名難治時廣漢馮顥爲令而太守京兆劉宣不奉法令顥奏之立文學學徒八百人實戶口萬八千開稻田百頃治蹟尤異後有廣漢劉龐爲令大姓恣縱諸趙倚公故多犯法濮陽太守趙子真父子強橫龐治其罪莫不震肅郫民楊伯侯奢侈大起塚營因龐爲郫令伯侯遂徙占成都龐復爲成都豪右敬服有蜀侯祠大姓有柳杜張趙郭楊氏豪富先有程鄭郗



公後有郭子平奢豪楊伯侯兄弟 郫縣郡西北六十里冠冕大姓何羅郭氏 繁縣郡北九十里有泉水稻田三張爲甲族 江原縣郡西渡大江濱文井江去郡一百二十里有青城山稱江祠安漢上下朱邑出好麻黃潤細布有羌筒盛小亭有好稻田東方常氏爲大姓文井上有守捉三十里上有天馬祠 臨邛縣郡西南二百里本有邛民秦始皇從上郡實之有布濮水從布濮來合火井江有火井夜時光映上昭民欲其火光以家火投之頃許如雷聲火焰出通耀數十里以竹筒盛其光藏之可拽行終日不滅

也井有二水取井火煮之一斛水得五斗鹽家火煮之得無幾也有古石山有石鑛大如蒜子火燒合之成流支鐵甚剛因置鐵官有鐵祖廟祠漢文帝時以鐵銅賜侍郎鄧通通假民卓王孫歲取千足故王孫貨累巨萬億鄧通錢亦盡天下王孫女文君能鼓琴時有司馬長卿者臨邛令王吉與之遊王孫家文君因奔長卿漢世縣民陳立歷巴郡牂柯天水太守有異政陳氏劉氏爲大姓冠蓋也 廣都縣郡西三十里元朔二年置有鹽井漁田之饒大豪馮氏有魚池鹽井縣凡有小井十數所及魚田之饒江有魯漕梁

華陽國志 卷之三  
山有鐵鑛江西有安稻田穿山崖過水二十里漢時  
縣民朱辰字元燕爲巴郡太守甚著德惠辰卒官郡  
獯民北送及墓獯鼗鼓刀辟踊感動路人於是葬所  
草木頃許皆倣之曲折迄今蜀人莫不歎辰之德靈  
爲之感應今朱氏爲首族也成都市官本有長建武  
十八年省蜀郡太康初屬王國改號曰成都內史王  
改封乃復舊

廣漢郡高帝六年置屬縣八漢戶十七萬晉四萬去  
洛三千里南去成都百二十里西接汶山北接梓潼  
東接巴郡本治繩鄉安帝永和中陰平漢中羌反元

初二年移涪後治雒城王莽改曰就都公孫述名曰  
子同益州以蜀郡廣漢犍爲三蜀土地沃美人士俊  
乂爲一州稱望然漢選蜀郡廣漢太守每重德高俊  
故前有趙護第五伯魚後有蔡陳表章禮物殊於諸  
郡其太守著功德者有劉感孫賓蔡陳寵伯魚自郡  
徑遷司徒寵亦至三公而殺諷尹睦鮮于定趙瑤皆  
公望也薛鴻輩卿佐也而許靖亦爲上公及何祗常  
閣皆有稱望以處州中益州恒治此郡初平中益州  
牧劉焉自綿竹移雒縣城築闕門云其地不王乃留  
孫修據之建安十八年劉先主自涪攻圍且一年軍



師龐統中流矢歿先主痛惜言則涕泣廣漢太守南陽張存曰統雖可惜違大雅之體先主怒曰統殺身成仁非仁者乎卽免存官十九年牧雒城援襄陽馬良書詣諸葛亮曰承雒縣已下尊兄配業先國臯兆見矣時州或治成都時復治雒爲蜀淵府 雒縣郡治汎鄉有孝子姜詩田地宅姓族有鐔李郭翟氏綿竹縣劉焉初所治綿與雒各出稻稼畝收三十斛有至十五斛漢時任安定祖以儒學教號侔洙泗有多士秦杜爲首族也 什邡縣山出好茶楊氏爲大姓美田有鹽井 新都縣蜀以成都廣都新都爲三

都號名城有金堂山水通于巴漢時五倉名萬安倉有棗魚梁多名士有楊厚董扶又有四姓馬史汝鄭者也 五城縣郡東南有水通于巴漢時置五倉發五縣民尉部主之後因以爲縣出龍骨云龍升其山值天門閉不達墮歿於此後沒地中故掘取得龍骨

鄆縣有山原田富國鹽井濮出好棗宜君山出麋尾特好入貢大姓王李氏又有高馬家世常部曲蜀時高勝馬泰皆叛伏誅 廣漢縣有山原田蜀時彭義有雋才晉世改號令德故二姓爲甲族也 德陽縣有青石祠山原肥沃有澤漁之利士女貞孝望山

華陽國志 卷之三  
樂水土地易爲生事車騎將軍鄧芝雅有終焉之思  
後遂葬其山太守夏侯慕時古濮爲功曹康古袁氏  
爲四姓大族之甲者也劉氏延熙中分廣漢四縣置  
東廣漢郡咸熙初省泰始末又分置新都郡太康省  
末年又置蜀王國蜀郡常騫爲內史永嘉末省

犍爲郡孝武建元六年置時治營縣十二漢戶十萬  
營故犍爲地是也營有犍山見保乾圖武帝初欲開  
南中令蜀通犍青衣道是元年犍道令通之費功無  
成百姓愁怨司馬相如諷諭之使者唐蒙將南入以  
道不通執令將斬之令歎曰忝官益土恨不見成都

市蒙卽令送成都市而殺之蒙乃斬石通閣道故世  
爲諺曰思都郵斬令頭云後蒙爲都尉治南夷道元  
光五年郡移治南廣四年益州刺史任安城武陽孝  
昭元年郡治夔道後遂徙武陽至晉屬縣五戶二萬  
去洛三千二百七十里東接江陽南接朱提北接蜀  
郡西接廣漢王喬升其北山彭祖家其彭蒙白虎仁  
於廣德寶鼎見於江漑緩和五年又上寶磬十六劉  
向以爲美化所降用立辟雍而士多仁孝女姓貞專  
王莽改曰西順郡人不會更始都南陽遠奉貢職及  
公孫述有蜀郡拒守述伐之郡功曹朱遵逆戰衆寡



不敵遵絆馬歿戰遂爲述所并而任君業閉戶費貽  
素隱光武帝嘉之曰士大夫之郡也郡去成都百五  
十里渡大江昔人作大橋曰漢安橋廣一里半每秋  
夏水盛斷絕歲歲修理百姓苦之建安二十一年太  
守南陽李嚴乃鑿天社山尋江通車道省橋梁三津  
吏民悅之嚴因更造起府寺觀壯麗爲一州勝宇二  
十四年黃龍見武陽赤水九日蜀以劉氏瑞應其太  
守漢興以來鮮有顯者 武陽縣郡治有王喬彭祖  
祠蒲江大堰灌郡下六門有朱遵祠山出鐵及白玉  
特多大姓有七陽五李諸姓十二也 南安縣郡東

四百里治青衣江會縣溉有名灘一曰雷垣二曰鹽  
概李冰所平也有柑橘官社漢有鹽井南安武陽皆  
出名茶多陂池西有熊耳南有峨眉山山去縣八十  
里孔子地圖言有仙藥漢武帝遣使者祭之欲致其  
藥不能得有四姓能宣謝審五大族楊費又有信士  
呂孟貞紀至行也 夔道縣在南安東四百里拒郡

百里高后六年城之治馬湖江會水通越雋本有夔

人故秦紀言夔童之富漢民多漸斥徙之有荔支薑

蒟濱江有兵欄後漢書注引本志云有玉兵蘭疑兵欄李冰燒之崖有

五色赤白映水玄黃魚從楚來至 而止畏崖映水

也有韓原素祠又有孝子隗通爲母汲江齋水天爲  
出平石生江中今石在馬湖江而孝子吳順養母赤  
烏巢其門崩容江出好磨石崩江多魚民失在於徵  
巫好鬼妖大姓吳隗又有楚石薛相者 牛鞞縣受  
新都江去郡三百里元鼎二年置相陽明鹽井程韓  
氏爲冠蓋之族資中縣受牛鞞江也

江陽郡先有王延世著勳河平後有董鈞爲漢定禮  
王董張趙爲四族二縣在中多山田少種稻之地本  
犍爲枝江都尉建安十八年置郡漢安程徵石謙白  
州牧劉璋求立郡璋聽之以都尉廣漢成存爲太守

屬縣四戶五千去洛四千八十里東接巴郡南接牂  
柯西接廣漢犍爲北接廣漢有荔支巴菽桃枝蒟給  
橙俗好文刻少儒學多樸野蓋天性也 江陽縣郡

治江雒會有方山蘭祠江中有大關小關季春黃龍  
堆沒關卽平昔云世祖微時過江陽有一子望氣者

曰江陽有貴兒氣王莽求之縣人殺之後世祖爲子  
立祠謫江陽民不使冠帶者數世有富義鹽井又郡

下百二十里者曰伯塗魚梁六伯氏女爲塗氏婦梁  
四姓王孫程鄭八族又有魏趙先周也

有荔支巴菽  
桃枝蒟給橙

字與上文巴志序所  
稱菓蔓名大同小異

漢安縣郡東五百里土地雖



善陽圖志 卷之三  
迫山水特美好宜蠶桑有鹽井魚池以百數家家有  
馬一郡豐沃四姓程石姚郭八族張季李趙輩而程  
石傑立郡常秉議論選之 符縣郡東二百里元鼎  
二年置治安樂水會東接巴蜀樂城南水通平羌壑  
縣永建元年十二月縣長趙祉遣吏先尼和拜檄巴  
蜀守過成瑞灘死子賢求喪不得女絡年二十五廼  
分金珠作二錦囊繫兒頭下至二年二月十五日女  
絡乃乘小船至父沒所哀哭自沈見夢告賢曰至二  
十一日與父歿俱出至日父子浮出縣言郡太守蕭  
登高之上尚書遣戶曹掾爲之立碑人爲語曰符有

先絡熨道張帛求其人天下無有其偶者矣

按熨道黃帛張

貞妻也沈身求貞事頗類此語乃云

新樂縣郡西二百八十里元康

五年置西楚熨道有鹽井大姓魏呂氏

汶山郡本蜀郡北部冉駝都尉孝武元封四年置舊

屬縣八戶二十五萬去洛三千四百六十三里東接

蜀郡南接漢嘉西接梁州酒泉北接陰平有六夷羌

胡羌虜白蘭蚰九種之戎牛馬旄氍斑罽青頓髦毼

羊羖之屬特多雜藥名香土地剛鹵不宜五穀惟種

麥而多冰寒盛夏凝凍不釋故夷人冬則避寒入蜀

庸賃自食夏則避暑反落歲以爲常故蜀人謂之作

五百石子也宣帝地節元年武都白馬羌反使者駱  
武平之因拜越雋太守迎者如雲後蜀郡趙溫亦著  
治績故王莽遣任貴爲鎮戍大尹守之自建武後數  
叛章武三年越雋叟大師高定元稱王恣睢遣都督  
李承之殺將軍梓潼焦璜破沒郡土丞相亮遣越雋  
太守龔祿任安上縣遙領太守安上去郡八百里有  
名而已建興三年蜀安南將軍馬忠率越雋郡夷郡  
夷剛狼皆鴟視忠率越雋太守張嶷將所領之郡誘  
殺蘇祈邑君冬逢及其弟隗渠等懷集種落威信允  
著諸種漸服又斬斯都耆師李承之首及手殺焦璜

龔祿者也又討叛鄙降夷人安種落蠻夷率服嶷始

以郡鄆宇頽更築小塢居之

舊本記此段訛舛不可重叙姑考事之本末畧

加整頓刻之

延熙二年乃還舊郡更城郡城夷人男女莫

不致力興復七縣嶷遷復後頗窅究雖有四部斯兒

及七營軍不足固守乃置赤甲北軍二牙門及斯兒

督軍中堅衛夷徼 邛都縣郡治因邛邑名也邛之

初有七部後爲七部營軍又有四部斯兒南山出銅

有溫泉穴冬夏熱其温可湯雞豚下流治疾病餘多

惡水水神護之不可污穢及沈亂髮照回則使人被

惡疾一郡通云然 臺登縣有孫水一曰白沙江入



馬湖水山有砮石火燒成鐵剛利禹貢厥賦砮是也

又有漆漢末夷皆有之嶷取焉張嶷也 闡縣故邛人

邑邛都接寒關今省 蘇示縣漢末夷王及弟隗渠

數偕叛以服諸種張嶷先殺王弟隗渠又叛遁入西

徼遣親信二人使嶷嶷知姦計以重賂使使殺渠渠

歿夷徼肅清縣晉省 會無縣路通寧州渡瀘得任

狼縣故濮人邑也今有濮人冢冢不閉戶其穴多有

碧珠人不可取取之不祥有天馬河馬日千里後歿

於蜀莽江原小亭今天馬冢是也縣有天馬祠初民

家馬牧山下或產駿駒云天馬子也今其天馬逕厥

迹存焉河中有銅船今以羊祀之可取河中見存土

地時產犀牛山色青碧

後漢書註引  
本志曰元馬

大竿縣漢末

省也

定笮縣笮笮夷也汶山曰夷南中曰昆明漢

嘉越雋曰笮蜀曰邛皆夷種也縣在郡西渡瀘水賓

剛徼白摩沙夷有鹽池積薪以齊水灌而後焚之成

鹽漢末夷皆錮之張嶷往爭夷帥岑槃木明不肯服

嶷禽撻殺之厚賞賜餘類皆安官迄有之北沙河是

三縫縣一曰小會無音三播

音三播  
字疑誤

通道寧州渡

瀘得蜻蛉縣有長谷石時平中有石豬子母數千頭

長老傳言夷昔牧豬於此一朝豬化為石迄今夷不

敢往牧 岷水縣去郡三百里水流通馬湖 潛溪  
縣漢末置晉初省 安上縣 馬湖縣水通夔道入  
江晉初省 右益州漢初統郡五後漸分建蜀郡及  
巴郡又分爲五郡廣漢漢中捷爲爲四郡又開益州  
五郡合二十五郡又寧州梁州建復增七郡蜀於是  
有州四十二郡一百九十六縣州州分後益州凡新  
舊郡九縣四十八戶夷晉二十四萬

誤曰蜀之爲邦天文井絡輝其上地理岷嶓鎮其域  
五岳華山表其陽四瀆則汶江出其徼故上聖則大  
禹生其鄉媾姻則黃帝婚其 族大賢彭祖育其

山列仙王喬升其岡而寶鼎輝光於中流驪龍仁虎  
躍乎淵陵開闢及漢國富民殷府腐穀帛家蘊畜積  
雅頌之聲充塞天衢中穆之詠侔乎二南蕃衍三州  
土廣萬里方之九區於斯爲盛固乾坤之靈囿先王  
之所經緯也



